

an welche ort die Klufft zu dem gang eilet
allda sol man tröstlich nachbawen vnnnd
sencken. **S**o aber die selbige Klufft vom
Gang eilet / ist zu besorgē / das schwerlich
etwas mercklichs darauff zu Bawenn ste-
het / **E**s were dann das sie hinauß werts
zu einem anderen **G**ang eilte. Darumb ist
gar rethlich / wo solch hengklufft / die ge-
digen **G**old füren / von dem **G**ang eilen
vnd fallen / das man auff das selbe ort mit
schürpffen eyn erfahrung odder sūchung
nach andern **G**engen thū / vnnnd also mit
fürsichtigkayt die Klufftgeschick vnnnd
Geng bey eynander erbawe.

Das VI. Capitel.

Don dem zinartz

Zinartz / oder der Zwittern / wirt auß
Jupiters eynfluß gewirckt / von
reynem quecksilber vñ wenigem schwefel
vnd inn der vermischung diser beyden /
werden vndermenget vnärtige grobe sch-
weflige bradem / die sich mit eynander in-
corporieren vnd vereinigen / zu eynem me-
tall / **Z**in genant / von welchem vnärtigen
bradem / eyn jetlichs zin / starck / riechēd /
knirschig vñ brüchig ist / also dz es auch all
E iij metall